

Na Presidente di Parlamento

drs. P.F.T. Croes

Presente



Aruba, 19 di juni 2012.

**Topico: kitamento di tereno cu ta ser uza pa agricultura y cria di bestia**

Respetable Presidente,

Ricibi adhunto preguntanan dirigi na minister di Integracion Infraestructura y Medio Ambiente y na ministr di Turismo, a base di articulo III.17 di nos Constitucion y articulo 59 di Reglamento di Ordo di Parlamento.

Atentamente,

drs. M.G. Wyatt-Ras, miembro independiente di Parlamento

## **Preguntanan pa minister di Integracion, Infraestructura y medio Ambiente y Ministro di Turismo**

Den curso di simannan pasa y comienso di e siman aki a inicia cu rozamento y tumamento di tereno di gobierno for di cuidadanonan. Segun por a compronde gobierno tin pensa di traha viviendanan ariba e terenonan aki. Sr. Bareño y famia di Piedra Plat a sinti cu ela bira victima di esaki. Pa hopi anjanan su antepasadonan a yega na un acuerdo cu gobierno pa haci uzo di un tereno pa agricultura y cria di bestia. Recientemente gobierno a cuminsa cu trabaonan pa prepara pa bai construi sin tuma contacto cu e persona en cuestion, Chubato a bin ranka trankerea, mata di Calbas y otro mata di fruta cu tin anjanan planta den e cunuku y cu tin valor historico. A tuma contacto cu gobierno y segun por a compronde minister a duna di conoce na e yiu muher cu no lo kita e tereno. Sinembargo e siman cu a pasa gobierno a cuminsa cu rozamento. Na momento ey a haya contacto cu DOW y cu DIP y DIP a sinta na mesa cu yiu muher di sr. Bareño. Sinembargo sr. Bareño cu pa anjanan a haci uzo di e tereno no ta mira cu gobierno por yega sin mas pa kita esaki for di dje. En especial ora cu gobierno ta anuncia cu nan ta promove naturalesa, cunukeronan y un green Aruba, ta increibel cu e mesun gobierno aki ta skohe pa kita un tereno di agricultura y cria di bestia di un di nos grandinan.

Ta parse cu sr. Bareño ta ser manda di cashi pa muraya y gobierno en cuestion ta pusha e decision pa esnan cu ta traha den e departamentonan, y cada biaha e tin cu sinti e menasa di chubato cu ta kibra trankera y su matanan, locual no ta acceptable.

En bista di e situacion aki suscrito aserca ministernan cu diferente pregunta, segun articulo III.7 di nos Constitucion y articulo 59 di Reglamento di Ordo di Parlamento di Aruba.

1. A base di ki argumentonan ta dicidi di kita tereno for di cuidadanonan cu a haci uzo di esakinan pa asina tanto anja pa planta y pa cria bestia?
2. Ta trata un persona di edad y teniendo cuenta cu esaki kico gobierno ta bai haci pa asina tene cuenta cu e persona aki y otro persona den mesun situacion cu semper por a haci uzo di un tereno pa un cierto proposito, den e caso aki agricultura y cria?
3. Den e cunucu tin alavez grafnan cu tin valor historico. Gobierno tin pensa tog di construi na e sitio aki of kico gobierno lo haci pa conserva esakinan?

4. Ki ta e maneho di minister pa loke ta trata conservacion di naturalesa, stimula cunukero y criador di bestia?
5. Ta parse cu ta necesario synchronisacion entre ministernan. Ki minister di infraestructura ta bai haci y kico minister di Turismo lo bai haci al respecto?
6. Por a tende di mas persona cu ta tratando di kita tereno for di nan, entre otro na San Nicolaas. Gobierno por duna Parlamento informacion di su maneho pa kita tereno di ciudadano pa asina destina nan pa otro meta?
7. Unda e ciudadanonan aki lo por bai pa impedi esaki of pa haya oido?
8. Kico minister ta bai haci cu e caso di sr. Bareño?

Suscrito ta pidi atencion di ministernan pa contesta e preguntanan por escrito mas pronto cu ta posibel.

Atentamente,



drs. M.G. Wyatt-Ras